

摘藻堂四庫全書薈要

史部

欽定四庫全書薈要卷三千八百七十四

史部

後漢書卷三十九

梁

剡

令劉

昭補并注

輿服志第二十九

輿服上

王輅

乘輿

金根

安車

立車

耕車

戎車

獵車

輶車

青蓋車

緣車

皂蓋車

夫人安車

大駕

法駕

小駕

輕車

大使車

小使車

載車

導從車

車馬飾

書曰明試以功

孔安國曰攷試其居國為政以差其功

車服以庸

孔安國曰賜以

車服以旌其德用所任也又一通諸侯四朝各使陳進  
治化之言明試其言以要其功功成則錫車服以表顯  
其能用言昔者聖人興天下之大利除天下之大害躬親

其事身履其勤憂之勞之不避寒暑使天下之民物各  
得安其性命無天昏暴陵之災是以天下之民敬而愛  
之若親父母則而養之若仰日月夫愛之者欲其長久  
不憚力役相與起作宮室上棟下宇以雍覆之欲其長  
久也敬之者欲其尊嚴不憚勞煩相與起作輿輪旌旗  
章表以尊嚴之斯愛之至敬之極也苟心愛敬雖報之

至情由未盡或殺身以為之盡其情也奕世以祀之明其功也是以流光與天地比長後世聖人知恤民之憂思深大者必饗其樂勤仁毓物使不夭折者必受其福故為之制禮以節之使夫上仁繼天統物不伐其功民物安逸若道自然莫知所謝老子曰聖人不仁以百姓為芻狗此之謂也夫禮服之興也所以報功章德尊仁尚賢故禮尊尊貴貴不得相踰所以為禮也非其人不  
得服其服所以順禮也順則上下有序德薄者退德盛

者縟故聖人處乎天子之位服玉藻遂延日月升龍山

車金根飾黃屋左纛所以副其德章其功也賢仁佐聖

封國愛民黼黻文繡降龍路車所以顯其仁光其能也

及其季末聖人不得其位賢者隱伏是以天子微弱諸

侯脅矣於是相貴以等相黷以貨相賂以利天下之禮

亂矣至周夷王下堂而迎諸侯此天子失禮微弱之始

也自是諸侯宮縣樂食祭以白牡擊玉磬朱干設錫冕

而儻大武

鄭玄注禮記曰此皆天子之禮也宮縣四面縣也干盾也錫傳其背如龜也武萬舞也白

牡大路殷天子之禮也白牡殷牡

大夫臺門旅樹反坫繡黼丹朱中衣

鏤簋朱紘此大夫之僭諸侯禮也

鄭玄曰此皆諸侯之禮也旅道也屏謂之

樹所以蔽行道管氏樹塞門塞猶蔽也禮天子外屏諸侯內屏大夫以簾士以帷反坫反爵之坫也蓋在樽南

兩君相見主君既獻於此反爵焉繡黼丹朱以為中衣領緣也繡讀為綃綃繒名也詩云素衣朱綃又曰素衣

朱褰褰繡領也鏤簋謂刻而飾之也大夫刻之為龜耳

諸侯飾以象天子飾以玉朱紘天子冕之紘也諸侯青

組大夫士當緇組紘纁邊詩刺彼已之子不稱其服傷其敗化易譏

負且乘致寇至言小人乘君子器盜思奪之矣自是禮

制大亂兵革竝作上下無法諸侯陪臣山竅藻稅降及

戰國奢僭益熾削滅禮籍蓋惡有害已之語競修奇麗之服飾以輿馬文罽玉纓象鑣金鞍以相夸上爭錐刀之利殺人若刈草然而宗祀亦旋夷滅榮利在已雖死不悔及秦并天下攬其輿服上選以供御其次以錫百官漢興文學既缺時亦草創承秦之制後稍改定參稽六經近於雅正孔子曰其或繼周者行夏之正乘殷之輅服周之冕樂則韶舞故撰輿服著之于篇以觀古今損益之義云上古聖人見轉蓬始知為輪輪行可載因

物知生復為之輿輿輪相乘流運罔極任重致遠天下

獲其利後世聖人觀於天視斗周旋魁方杓曲

春秋緯曰瑤光

第一至第四為魁第五至第七為杓合為斗

以攜龍角為帝車於是廼曲其

輶乘牛駕馬登險赴難周覽八極故易震乘乾謂之大

壯言器莫能有上之者也

孝經援神契曰斗杓橈象成車房為龍馬華蓋覆鉤天

星既體蒼龍又象駕馬故兼言之也覆鉤既覆且鉤

曲似蓋也天罡入魁又似御陪乘

自是以來世加其飾至奚仲為夏車

正建其旂旒尊卑上下各有等級

世本云奚仲始作車古史考曰黃帝作車



引重致遠其後少昊時駕牛禹時奚仲駕馬臣昭案服牛乘馬以利天下其所起遠矣豈奚仲為始世本之誤

史考所說是也

周室大備官有六職百工與居一焉

周禮曰審曲面勢以

飭五材以辨民器謂之百工

一器而羣工致巧者車最多是故具物

以時六材皆良

鄭玄曰取幹以冬取角以秋絲漆以夏筋膠未聞自此至弧旌枉矢皆出周禮

鄭玄曰即是周禮注

輿方法地蓋圓象天三十輻以象日月

鄭玄曰輪

象日月者以其運行也

蓋弓二十八以象列星龍旂九

旂七仞齊軫

鄭玄曰軫謂車後橫木

以象大火

鄭玄曰交龍為旂諸侯之所建也大

火蒼龍宿之心其屬有尾尾九星

鳥旗七旂五仞齊較

鄭玄曰較者車高檻木也

以

象鵠火

鄭玄曰鳥隼為旗州里之所建鵠火朱鳥宿之柳其屬有七星

熊旗六旂五仞

齊肩以象參伐

鄭玄曰熊虎為旗師都之所建伐屬白虎宿與參連體而六星

龜旒四

旂四仞齊首以象營室

鄭玄曰龜蛇為旒縣鄙之所建營室玄武宿與東壁連體而四

星弧旌枉矢以象弧也

鄭玄曰觀禮曰侯氏載龍旂弧羈則旌旗之屬皆有弧也弧以

張縵之幅有木謂之羈又為設矢象弧星有矢也妖星有枉矢者蛇行有尾因此云枉矢蓋畫之玄注禮含文

嘉曰蓋旗有九名日月為常交龍為旂通帛為旛雜帛為物熊虎為旗鳥隼為旒龜蛇為旒全羽為旒析羽為

旒盧植注禮記曰有鈴曰旂干寶注周禮曰枉矢象妖星非其義也枉蓋應為枉直謂枉矢於弧

此諸

侯以下之所建者也

白虎通曰居車中不內顧也仰即觀天俯即察地前聞和鸞之聲旁

見四方之運此車教之道論語曰升車必正立執綏車中不內顧所以有和鸞以正威儀節行舒疾也鸞者在衡和在軾馬動則鸞鳴鸞鳴則和應其聲名曰和敬舒則不鳴疾則失音明得其和也故詩云和鸞雍雍萬福攸同魯訓曰和設軾者也鸞設衡者也許慎曰詩云八鸞鎗鎗則一馬二鸞也又曰輜車鸞鑣知非衡也毛詩傳曰在軾曰和在鑣曰鸞杜預注左傳亦云鸞在鑣和在衡傳玄乘輿馬賦注曰鸞在馬勒鑣干寶周禮注曰和鸞皆以金為鈴史記曰前有錯衡所以養目也步中武象駟中韶護所以養耳也龍旂九旒所以養信也寢兕持虎蛟韞彌龍所以養威也故大路之馬必信至教順然後乘之所以養安也

天子五路

周禮王之五路一曰玉路二曰金路三曰象路四曰革路五曰木路釋名曰天子所乘曰

路路亦軍事也謂之路言行路也

以玉為飾

古文尚書曰大路在賓階面綴路在阼階面孔安國

曰大路玉綴路金也服虔曰大路總名也如今駕駟高車矣尊卑俱乘之其采飾有差鄭玄曰王在馬曰路以

玉飾諸末也傳玄乘輿馬賦注曰玉路重較也韻集曰軹前橫木曰路

錫樊纓十有再就

鄭玄曰錫面當盧刻金為之所謂鏤錫也樊讀如鞞帶之鞞謂今馬大帶也鄭衆曰纓謂當冑士喪禮曰馬纓

三就以削草為之三就三重三匝也鄭玄曰纓今馬鞞玉路之樊及纓皆以五采罽飾之十二就就成也杜預

曰纓在馬脅前如索帟乘輿馬賦注曰繁纓飾以旄尾金塗十二重建太常十有二旂九

仞曳地鄭衆曰太常九旗之畫日月者鄭玄曰七尺為仞天子之旗高六丈三尺日月升龍

象天明也崔駰東巡頌曰登天靈夷王以下周室衰弱之威路駕太一之象車

諸侯大路秦并天下閱三代之禮或曰殷瑞山車金根

之色

殷人以為大路於是始皇作金根之車殷曰乘根秦改曰金根乘輿馬賦注曰金根以金為飾

漢

承秦制御為乘輿孔子所謂乘殷之輅者也

乘輿

金根

安車

立車

蔡邕曰五安五立徐廣曰立乘曰高車坐乘曰安車

輪皆朱班重牙

周禮曰牙也者以為固抱也鄭衆曰牙謂輪輹也世間或謂之輹

貳轂

兩轄

蔡邕曰轂外復有一轂抱轄其外乃復設轄抱銅置其中東京賦曰重輪貳轄疏轂飛軫

金薄

繆龍為輿倚較

徐廣曰繆交錯之形也較在箱上說文曰櫜文畫蕃蕃箱也通俗文曰車箱為

較

文虎伏軾

魏都賦注曰軾車橫覆膝人所馮止者也

龍首銜軛左右吉陽

笏鸞雀立衡

徐廣曰置金鳥於衡上

櫜文畫輶羽蓋華蚤

徐廣曰翠羽蓋

黃裏所謂黃屋車也金華施棹末有二十八枚即蓋弓也東京賦曰樹翠羽之高蓋薛綜曰樹翠羽為蓋如雲

龍矣金作華

形莖皆低曲建大旂十二旂畫日月升龍駕六馬

東京賦云

六玄虬之奕奕

象鑣鏤錫金鏐方鈇插翟尾

獨斷曰金鏐者馬冠也高廣各五寸

上如五華形在馬髦前方鈇鐵也廣數寸在馬鏐後後有三孔插翟尾其中薛綜曰鈇中央兩頭高如山形而

貫中翟尾結著之顏延之幼誥曰鈇乘輿馬頭上防鈇角所以防罔羅鈇以翟尾鐵翾象之也徐廣曰金為馬

髦丈朱兼樊纓赤罽易茸金就十有二左纛以鼂牛尾為

之在左駢馬軛上大如斗

徐廣曰馬在中曰服在外曰駢駢亦名駟蔡邕曰在最後

左駢馬頭上

是為德車五時車安立亦皆如之各如方色馬

亦如之白馬者朱其髦尾為朱鬣云所御駕六餘皆駕

四後從為副車

古文尚書曰予臨兆民凜乎若朽索之馭六馬逸禮王度記曰天子駕六馬諸

侯駕四大夫三士二庶人一周禮四馬為乘毛詩天子至大夫同駕四士駕二易京氏春秋公羊說皆云天子駕六許慎以為天子駕六諸侯及卿駕四大夫駕三士駕二庶人駕一史記曰秦始皇以水數制乘六馬鄭玄以為天子四馬周禮乘馬有四圉各養一馬也諸侯亦四馬顧命時諸侯皆獻乘黃朱乘亦四馬也今帝者駕六此自漢制與古異耳蔡邕表志曰以文義不著之故俗人多失其名五時副車曰五帝車鸞旗曰雞翹耕根曰三蓋其比非一也

耕車其飾皆如之有三蓋一曰芝車置轡耒耜之簞上

親耕所乘也

新論桓譚謂揚雄曰君之為黃門郎居殿中數見輿輦玉蚤華芝及鳳皇三蓋之屬

皆玄黃五色飾以金玉翠羽珠絡錦繡茵席者也東京賦曰立戈迤邐憂農輿路木薛綜曰戈句子戟戛長矛置車上者邪柱之迤邐也是謂戈路農輿三蓋所謂耕根車也東耕于藉乘馬無飾故稱木也賀循曰漢儀親耕青衣幘東京賦說親耕亦云鸞路蒼龍賀循曰車必有鸞而春獨鸞路者鸞鳳類而色青故以名春路也賦又曰介御間以剡耜薛綜曰耜耒金也廣五寸著耒耜而載之天子車參乘帝在左御在中介處右以耒置御之右

戎車其飾皆如之蕃以矛麾金鼓羽析幢翳輶胄甲弩

之簠

漢制度曰戎立車以征伐周官其矢簠通俗文曰箭簠謂之步义干寶亦曰今謂之步义鄭玄注既



夕曰服車箱也顏延之幼誥云弩矢也

獵車其飾皆如之重輜縵輪繆龍繞之一曰闔猪車親

校獵乘之

魏文帝改曰闔虎車

太皇太后皇太后法駕皆御金根

重翟羽蓋者也

加交路帳裳

徐廣曰青交路青帷裳

非法駕則乘紫罽駟車

字林曰駟車有衣蔽無後轅者謂之

輜也釋名駟屏也四屏蔽婦人乘牛車也有

雲櫜文畫

駟黃金塗五末

徐廣曰未詳疑謂前一轅及銜端轂頭也

蓋蚤左右駢駕三

馬

長公主赤罽輶車

大貴人貴人公主王妃封君油畫輶車大貴人加節畫輶皆右駢而已皇太子皇子皆安車朱班輪青蓋金華蚤黑櫛文畫輶文輶金塗五末皇子為王錫以乘之故

曰王青蓋車

徐廣曰旂旗九旒畫降龍魏武帝令問東平王有金路何意為是特賜非侍中鄭稱

對曰天子五路金以封同姓諸侯得乘金路與天子同此自得非特賜也

皇孫綠車以從皆左右駢駕三

獨斷曰綠車名曰皇公孫車天子有孫乘之公

列侯安車朱班輪倚鹿較伏熊軾皐繒蓋黑輶右駢

車有

輜者謂之軒

中二千石二千石皆皂蓋朱兩輜其千石六百石朱左輜輜長六尺下屈廣八寸上業廣尺二寸九文十二初後謙二寸若月初生示不敢自滿也

案本傳舊典傳車驂駕乘赤帷裳唯

郭賀為冀州勅去檐帷謝承書曰孔恂字巨卿新淦人州別駕從事車前舊有屏星如刺史車曲翳儀式是時刺史行部發去日晏刺史怒欲去別駕車屏星恂諫曰明使君傳車自發晚而欲徹去屏星毀國舊儀此不可行別駕可去屏星不可省即投傳去刺史追辭謝請不肯還於是遂不去屏星說文曰車當謂之屏星景

帝中元五年始詔六百石以上施車輜得銅五末輓有

吉陽簞中二千石以上右駢三百石以上皐布蓋千石  
以上皐繒覆蓋二百石以下白布蓋皆有四維杠衣賈  
人不得乘馬車除吏赤畫杠其餘皆青云

古今注曰武帝天漢四年

令諸侯王大國朱輪特虎居前左兕右麋小國朱輪畫特熊居前寢麋居左右卿車者也

公列侯中二千石二千石夫人會朝若蠶各乘其夫之  
安車右駢加交路帷裳皆皐非公會不得乘朝車得乘  
漆布輜輶車銅五末

乘輿大駕公卿奉引太僕御大將軍參乘屬車八十一

乘

薛綜曰屬之言相連屬也皆在後為三行

備千乘萬騎西都行祠天郊甘

泉備之官有其注名曰甘泉鹵簿

蔡邕表志曰國家舊章而幽僻藏蔽莫之

得見東都唯大行乃大駕大駕太僕校駕法駕黃門令校

駕乘輿法駕八卿不在鹵簿中河南尹執金吾雒陽令

奉引奉車郎御侍中參乘屬車四十六乘前驅有九旂

雲罕

徐廣曰旂車有九乘前史不記形也武王剋紂百夫荷罕旗以先驅東京賦曰雲罕九旂薛綜曰旌

旗名鳳凰闕戟

薛綜曰闕之言函也取四戟函車邊

皮軒鸞旗

應劭漢官鹵簿圖曰乘輿

大駕則御鳳凰車以金根為列

皆大夫載

胡廣曰皮軒以虎皮為軒郭璞曰皮軒革車或曰即曲禮

前有士師則載虎皮

鸞旗者編羽旄列繫幢旁

胡廣曰建蓋在中

民或謂

之雞翹非也

胡廣曰鸞旗以銅作鸞鳥車銜上與本志不同

後有金鉦黃鉞

說文

曰鉞大斧也司馬法曰夏執鉞殷執白鉞周執黃鉞

黃門鼓車古者諸侯貳車

九乘秦滅九國兼其車服故大駕屬車八十一乘法駕

半之屬車皆阜蓋赤裏木輶戈矛弩箛尚書御史所載

最後一車懸豹尾

薛綜曰侍御史載之

豹尾以前比省中

小學漢官篇曰

豹尾過後罷屯解圍胡廣曰施於道路豹尾之內為省中故須過後屯圍乃得解皆所以戒不虞也淮南子曰

軍正執豹皮所以制正其衆禮記前載虎皮亦此之義類

行祠天郊以法駕祠地明

堂省什三祠宗廟尤省謂之小駕每出太僕奉駕上鹵簿中常侍小黃門副尚書主者郎令史副侍御史蘭臺令史副皆執注以督整車騎謂之護駕春秋上陵尤省於小駕直事尚書一人從其餘令以下皆先行後罷

輕車古之戰車也洞朱輪輿不巾不蓋建矛戟幢麾轡

輒弩服

徐廣曰置弩於軾上駕兩馬也

藏在武庫大駕法駕出射聲校

尉司馬吏士載以次屬車在鹵簿中諸車有矛戟其飾幡旂旗幟皆五采制度從周禮孫吳兵法云有巾有蓋

謂之武剛車武剛車者為先驅又為屬車輕車為後殿  
焉

大使車立乘駕駟赤帷持節者重導從賊曹車斧車督  
車功曹車皆兩大車伍百璫弩十二人辟車四人

周禮  
條狼

氏干寶注曰今  
卒辟車之屬從車四乘無節單導從減半小使車不

立乘有駢赤屏泥油重絳帷導無斧車近小使車蘭輿  
赤轂白蓋赤帷從騶騎四十人此謂追捕考案有所勅  
取者之所乘也諸使車皆朱班輪四輻赤衡軛其送葬



白堊已下洒車而後還公卿中二千石二千石郊廟明  
堂祠陵法出皆大車立乘駕駟他出乘安車

大行載車其飾如金根車加施組連璧交絡四角金龍  
首銜璧垂五采析羽流蘇前後雲氣畫帷裳櫛文畫曲  
輻長懸車等太僕御駕六布施馬布施馬者淳白駱馬  
也以黑藥灼其身為虎文既下馬斥賣車藏城北祕宮  
皆不得入城門當用太僕考工乃內飾治禮吉凶不相  
干也

公卿以下至縣三百石長導從置門下五吏賊曹督盜賊功曹皆帶劔三車從導主簿主記兩車為從縣令以上加導斧車公乘安車則前從并馬立乘長安雒陽令及王國都縣加前後兵車亭長

纂要雒陽亭長車前吹管

設右騂駕

兩璫弩車前伍伯公八人中二千石二千石六百石皆四人自四百石以下至二百石皆二人黃綬武官伍伯文官辟車軫下侍閣門闌部署街里走卒皆有程品多少隨所典領

驛馬三十里一置

臣昭案東晉猶有郵驛共置承受傍郡縣文書有郵有驛行傳以相付縣

置屋二區有承驛吏皆條所受書每月吉上州郡風俗通曰今吏郵書掾府督郵職掌此

卒皆赤幘

絳鞬云古者軍出師旅皆從秦省其卒取其師旅之名

焉公以下至二千石騎吏四人千石以下至三百石縣

長二人皆帶劔持棨戟為前列捷弓鞬九鞬

通俗文曰弓鞬謂之

鞬

諸侯王法駕官屬傳相以下皆備鹵簿似京都官騎

張弓帶鞬遮迺出入稱課促列侯家丞庶子導從若會

耕祠主縣假給辟車鮮明卒備其威儀導從事畢皆罷

所假諸車之艾乘輿倚龍伏虎櫨文畫輶龍首鸞衡重

牙班輪升龍飛軫

薛綜曰飛軫以緹油廣八寸長注地畫左蒼龍右白虎繫軸頭二千石亦

然但無畫耳盧植禮記注曰軫軾頭也楚辭云猗結軾今太息王逸注曰重較也李尤小車銘曰軾之謙噓疏達開通案二家之言不如綜注所記

皇太子諸侯王倚虎伏鹿櫨文畫輶輶吉陽簫朱班輪

鹿文飛軾旂旗九旒降龍公列侯倚鹿伏熊黑輶朱班

輪鹿文飛軾九旒降龍卿朱兩輪五旒降龍二千石以

下各從科品諸輶車以上輶皆有吉陽簫諸馬之文案

乘輿金鍍方釳插翟象鑣

爾雅注曰鑣馬勒旁鐵也此用象牙

龍畫總洙

升龍赤扇汗

詩云朱幘鑣鑣毛傳曰人君以朱纏鑣扇汗且以為鑣飾

青兩翬鷲尾

附馬左右赤珥流蘇飛鳥節赤膺兼皇太子或亦如之

王公列侯鏤錫义髦朱鑣朱鹿朱文絳扇汗青翬鷲尾  
卿以下有駢者緹扇汗青翬尾當盧义髦上下皆通中  
二千石以上及使者乃有駢駕云

後漢書卷三十九

後漢書卷三十九考證

輿服志上此諸侯以下之所建者也注其聲名曰和敬  
○名當作鳴

金鏐方釳插翟尾注方釳鐵也廣數寸在馬鏐後○鏐  
當作駿又注金為馬文髦一本或作馬文尾何焯校  
本作馬义髦

屬車皆皂蓋赤裏○裏應作裏

龍畫總洙升龍赤扇汗○洙應作沫

附馬○附應改駙

後漢書卷三十九考證

欽定四庫全書薈要卷三千八百七十五

史部

後漢書卷四十

梁

剡

令劉昭補并注

輿服志第三十

輿服下

冕冠

爵弁冠

長冠

通天冠

委貌冠

遠遊冠

皮弁冠

進賢冠

法冠

巧士冠

武冠

却非冠

建華冠

方山冠

術氏冠

鷩冠

却敵冠

幘

赤綬

佩

印

黃赤綬

黑綬

綠綬

紫綬

青綬

黑綬

黃綬

青綬

黑綬

後漢書



上古穴居而野處衣毛而冒皮未有制度後世聖人易

之以絲麻觀翬翟之文榮華之色乃染帛以效之始作

五采成以為服見鳥獸有冠角頰胡之制遂作冠冕纓

黼以為首飾凡十二章故易曰庖犧氏之王天下也仰

觀象於天俯觀法於地觀鳥獸之文與地之宜近取諸

身遠取諸物於是始作八卦以通神明之德以類萬物

之情黃帝堯舜垂衣裳而天下治蓋取諸乾以乾以有

文故上衣玄下裳黃日月星辰山龍華蟲

孔安國注尚書曰華象草

華蟲雉也

作績宗彝

古文尚書績作會孔安國曰以五采成此畫焉宗廟彝樽亦以山龍華蟲為飾

藻火粉米

孔安國曰藻水草有文者火為火字粉若粟米米若聚米

黼黻絺繡

孔安國曰

黼若斧形黻為兩已相背葛之精者曰絺五色備曰繡杜預注左傳曰白與黑謂之黼黑與青謂之黻

以

五采章施于五色作服

孔安國曰以五采明施于五色作尊卑之服

天子備

章

鄭玄周禮注曰此古天子冕服十二章

公自山以下侯伯自華蟲以下

子男自藻火以下卿大夫自粉米以下至周而變之以

三辰為旂旗王祭上帝則大裘而冕

鄭眾曰大裘羔裘服以祀天示質也

公侯卿大夫之服用九章以下

鄭玄曰華蟲五色之蟲周禮績人職曰鳥獸蛇

雜四時五色之位以章之謂是也王者相變至周而以日月星辰畫於旌旗所謂三辰旂旗昭其明也而冕服九章初一日龍次二曰山次三曰華蟲次四曰火次五曰宗彝皆畫以為績次六曰藻次七曰粉米次八曰黼次九曰黻皆紵以為繡則衮之衣五章裳四章凡九也鷩畫以雉謂華蟲也其衣三章裳四章凡七也毳畫虎雖謂宗彝也其衣三章裳二章凡五也絺刺粉米無畫也其衣一章裳二章凡三也法言曰聖人文質備也車服以章之藻色以明之聲音以揚之詩書以光之籩豆不陳玉帛不分琴瑟不鏗鐘鼓不鏘吾無以見乎聖也秦以戰國即天子位減去禮學郊祀之服皆以衽玄漢承秦故至世祖踐阼都于土中始修三雍正兆七郊顯宗遂就大業初服旒冕衣裳文章赤舄絢屨以祠天地

養三老五更於三雍于時致治平矣天子三公九卿特

進侯侍祠侯祀天地明堂皆冠旒冕衣裳玄上纁下

東觀

書曰永平二年正月公卿議春南北郊東平王蒼議曰孔子曰行夏之時乘殷之輅服周之冕為漢制法高皇帝始受命創業制長冠以入宗廟光武受命中興建明堂立辟雍陛下以聖明奉遵以禮服龍袞祭五帝禮缺樂崩久無祭天地冕服之制按尊事神祇絜齋盛服敬之至也日月星辰山龍華藻天王袞冕十有二旒以則天數旂有龍章日月以備其文今祭明堂宗廟圓以法天方以則地服以華文象其物宜以降神明肅雍備思博其類也天地之禮冕乘輿備文日月星辰十二章三冠裳衣宜如明堂之制

公諸侯用山龍九章九卿以下用華蟲七章皆備五采

大佩赤舄絢履以承大祭百官執事者冠長冠皆祗服  
五嶽四瀆山川宗廟社稷諸沾秩祠皆衾玄長冠五郊  
各如方色云百官不執事各服常冠衾玄以從

冕冠垂旒前後邃延

邃垂也延冕上覆

玉藻

周禮曰五采繅十有二就皆五采玉

十有二玉笄朱紘鄭玄注曰繅雜文之名也合五采絲為之繩垂於延之前後各十二所謂邃延也就成也繩之每一市而貫五采玉十有二旒則十二玉也每就間蓋一寸朱紘以朱組為紘也紘一條屬兩端於武此為衾衣之冕十二旒則用玉二百八十八驚衣之冕繅九旒用玉二百一十六毳衣之冕七旒用玉百六十八絺衣之冕五旒用玉百二十玄衣之冕三旒用玉七十二  
孝明皇帝永平二年初詔

有司采周官禮記尚書皋陶篇乘輿服從歐陽氏說公

卿以下從大小夏侯氏說冕皆廣七寸長尺二寸前圓

後方朱綠裏玄上前垂四寸後垂三寸係白玉珠為十

二旒以其綬采色為組纓

說文曰組綬屬也小者以為冕纓焉禮記曰玄冠朱組綬

天子之服是也

三公諸侯七旒青玉為珠卿大夫五旒黑玉為

珠

獨斷曰三公諸侯九旒卿七旒與此不同

皆有前無後各以其綬采色為

組纓旁垂黼纁

呂忱曰黼黃色也黃綿為之禮緯曰旒垂目纁塞耳王者示不聽讒不視非也

薛綜曰以珩玉為充耳也詩云充耳琇瑩毛萇傳曰充耳謂之瑱天子玉瑱琇瑩美石也諸侯以石郊天

地宗祀明堂則冠之

蔡邕曰鄙人不識謂之平天冠

衣裳玉佩備章采

乘輿刺史公侯九卿以下皆織成陳留襄邑獻之云

長冠一曰齋冠高七寸廣三寸促漆纚為之制如板以

竹為裏初高祖微時以竹皮為之謂之劉氏冠楚冠制

也民謂之鵲尾冠非也祀宗廟諸祀則冠之皆服衲玄

獨斷曰衲紺繒也吳都賦曰衲阜服也

絳緣領袖為中衣絳綉示其赤

心奉神也五郊衣幘綉各如其色此冠高祖所造故

以為祭服尊敬之至也

委貌冠皮弁冠同制長七寸高四寸制如覆杯前高廣後卑銳所謂夏之母追殷之章甫也委貌以皐絹為之皮弁以鹿皮為之行大射禮於辟雍公卿諸侯大夫行

禮者冠委貌衣玄端素裳

鄭衆周禮傳曰衣有襦裳者為端鄭玄曰謂之端取其正

也正者士之衣袂皆二尺二寸而屬幅是廣袞等也其袪尺二寸大夫以上侈之侈之者蓋半而益一焉半而益一則其袂三尺執事者冠皮弁衣緇麻衣皐領袖下

素裳所謂皮弁素積者也

皮弁質也石渠論玄冠朝服戴聖曰玄冠委貌也朝服布

上素下緇帛帶素韋鞞白虎通曰三王共皮弁素積素積者積素以為裳也言要中辟積也



爵弁一名冕廣八寸長尺二寸如爵形前小後大繒其

上似爵頭色有收持筭所謂夏收殷尋者也

獨斷曰殷黑而微白

前大而後小夏純黑亦前小而後大皆以三十六升漆布為之詩云常服黼尋書曰王與大夫畫弁上古皆以

布中古以絲孔子曰麻冕禮也今也純儉祠天地五郊明堂雲翹舞樂人服

之禮曰朱干玉鉞

鄭玄曰朱干赤大盾也鉞斧也

冕而舞大夏此之謂

也

通天冠高九寸正豎頂少邪却乃直下為鐵卷梁前有

山展筓為述乘輿所常服

獨斷曰漢受之秦禮無文

服衣深衣制有

袍隨五時色袍者或曰周公抱成王宴居故施袍禮記  
孔子衣逢掖之衣縫掖其袖合而縫大之近今袍者今  
下至賤更小史皆通制袍單衣阜緣領袖中衣為朝服  
云

遠遊冠制如通天有展筩橫之於前無山述諸王所服  
也

獨斷曰  
禮無文

高山冠一曰側注制如通天不邪却直豎無山述展筩

獨斷曰鐵為卷梁高九寸漢  
書音義曰其體側立而曲注

中外官謁者僕射所服太

傳胡廣說曰高山冠蓋齊王冠也秦滅齊以其君冠賜

近臣謁者服之

史記酈生初見高祖儒衣而冠側注漢舊儀曰乘輿冠高山冠飛月之纓幘耳

赤丹紉裏衣帶七尺斬蛇劍履虎尾絢履案此則亦通于天子

進賢冠古緇布冠也文儒者之服也前高七寸後高三

寸長八寸公侯三梁

胡廣曰車駕巡狩幸其國諸侯衣玄端之衣冠九旒之冕其盛法服

以就位也今列侯自不奉朝請侍祠祭者不得服此皆當三梁冠皐單衣其歸國流黃衣皐云晉公卿禮秩曰太傅司空司徒著進賢三梁冠黑介幘中二千石以下至博士兩梁自博

士以下至小史私學弟子皆一梁宗室劉氏亦兩梁冠

示加服也

獨斷曰漢制禮無文荀綽晉百官表注曰建光中尚書陳忠以為令史質堪上言太官宜

著兩梁尚書孟希奏太官職在鼎俎不列陞位堪欲令比大夫兩梁冠不宜許臣伏惟太官令職在典掌王饗統六清之飲列八珍之饌正百品之羞納四方之貢所奉尤重用思又勤明詔慎口實之御防有敗之姦增崇其選侍御史主捕案太醫令奉方藥供養符節令掌幡信金虎故位從大夫車有韜沂冠有兩梁所以殊親踈別內外也太官令以供養言之為最親近以職事言之為最煩多令又高選又執法比太醫令科同服等而冠二人殊名實不副又博士秩卑以其傳先王之訓故尊而異之令服大夫之冕猶此言之兩梁冠非必列於陞位也建初中太官令兩梁冠春秋之義太於復古如堪言合典可施行克厭帝心即聽用之獻帝起居注曰中平六年令三府長史兩梁冠五

時衣袍事位從千石六百石

法冠一曰柱後

獨斷曰柱後惠文

高五寸以纚為展筩

前書注曰纚今

之纒通俗文

鐵柱卷

荀綽晉百官表注曰鐵柱言其厲直不曲挽

執法者服

之侍御史廷尉正監平也或謂之獬豸冠獬豸神羊能

別曲直楚王嘗獲之故以為冠

異物志曰東北荒中有獸名獬豸一角性忠見

人闕則觸不直者聞人論則咋不正者楚執法者所服也今冠兩角非豸也臣昭曰或謂獬豸迺非定名在兩

角未足斷正安不存其豎飾令兩為冠乎

胡廣說曰春秋左氏傳有南冠而

縶者則楚冠也秦滅楚以其君服賜執法近臣御史服

之

武冠

一云古緇布冠之一象也或曰繁冠

一曰武弁大冠諸武官冠之

晉公

卿禮秩曰大司馬將軍尉驃騎車騎衛軍諸大將軍開府從公者著武冠平上幘

侍中中常侍

加黃金璫附蟬為文貂尾為飾謂之趙惠文冠

又名駿蟬冠

胡廣說曰趙武靈王效胡服以金璫飾首前插貂尾為

貴職秦滅趙以其君冠賜近臣

應劭漢官曰說者以金取堅剛百鍊不耗蟬居

高飲潔口在腋下貂內勁捍而外溫潤此因物生義也徐廣曰趙武靈王胡服有此秦即趙而用之說者蟬取其清高飲露而不食貂紫蔚柔潤而毛采不彰灼故於義亦取胡廣又曰意謂北方寒涼本以貂皮暖額附施於冠因遂建武時匈奴內屬世祖賜南單于衣服以中

慶成首飾

常侍惠文冠中黃門童子佩刀云

建華冠以鐵為柱卷貫大銅珠九枚制似縷鹿

獨斷曰其狀若

婦人縷鹿薛綜曰下輪大上輪小

記曰知天者冠述知地者履絢春秋

左傳曰鄭子臧好鷩冠前圓以為此則是也

說文曰鷩知天將雨

也鳥天地五郊明堂育命舞樂人服之

方山冠似進賢以五采縠為之祠宗廟大子八佾四時五行樂人服之冠衣各如其行方之色而舞焉

巧士冠高七寸要後相通直豎不常服唯郊天黃門從

官四人冠之在鹵簿中次乘輿車前以備宦者四星云

獨斷曰  
禮無文

却非冠制似長冠下促宮殿門吏僕射冠之負赤幡青

翅燕尾諸僕射幡皆如之

獨斷曰  
禮無文

却敵冠前高四寸通長四寸後高三寸制似進賢衛士

服之

獨斷曰  
禮無文

樊噲冠漢將樊噲造次所冠以入項羽軍廣九寸高七

寸前後出各四寸制似冕司馬殿門大難衛士服之或



曰樊噲常持鐵楯聞項羽有意殺漢王噲裂裳以裹楯冠之入軍門立漢王旁視項羽

術氏冠前圓吳制差池邐迤四重趙武靈王好服之今

不施用官有其圖注

淮南子曰楚莊王所服讎冠者是蔡邕曰其說未聞

諸冠皆有纓蕤執事及武吏皆縮纓垂五寸

武冠俗謂之大冠環纓無蕤以青系為緄加雙鶡尾豎

左右為鶡冠云

莊子曰纓胡之纓武士之服是也

五官左右虎賁羽林

五中郎將羽林左右監皆冠鶡冠紗縠單衣虎賁將虎

文綉白虎文劔佩刀虎賁武騎皆鷖冠虎文單衣褰邑  
歲獻織成虎文云鷖者勇雉也其鬪對一死乃止故趙  
武靈王以表武士秦施安焉徐廣曰鷖似黑雉出於上黨荀綽晉百官表注曰冠  
挿兩鷖鷖鳥之暴疏者也每所攫撮應爪摧劒天子武騎故以冠焉傳玄賦注曰羽騎騎者戴鷖

安帝立皇太子太子謁高祖廟世祖廟門大夫從冠兩  
梁進賢洗馬冠高山罷廟侍御史任方奏請非乘從時  
皆冠一梁不宜以為常服事下有司尚書陳忠奏門大  
夫職如諫大夫洗馬職如謁者故忠皆服其服先帝之

舊也方言可寢奏可謁者古者一名洗馬

古今注曰建武十三年初

令長皆小冠獨斷曰公卿侍中尚書衣卑而入朝者曰朝臣諸營校尉將大夫以下不為朝臣

古者有冠無幘其戴也加首有頰所以安物故詩曰有頰者弁此之謂也三代之世法制滋彰下至戰國文武並用秦雄諸侯乃加其武將首飾為絳帟以表貴賤其後稍稍作顏題漢興續其顏却搽之施巾連題却覆之今喪幘是其制也名之曰幘幘者幘也頭首嚴幘也至孝文乃高顏題續之為耳崇其巾為屋合後施收上下

羣臣貴賤皆服之文者長耳武者短耳稱其冠也尚書  
賸收方三寸名曰納言示以忠正顯近職也迎氣五郊

各如其色從章服也皐衣羣吏春服青幘立夏乃止助  
微順氣尊其方也武吏常赤幘成其威也未冠童子幘

無屋者示未成人也入學小童幘也句卷屋者示尚幼  
少未遠冒也喪幘却摻反本禮也升數如冠與冠偕也

期喪起耳有收素幘亦如之禮輕重有制變除從漸文

也獨斷曰幘古者卑賤執事不冠者之所服也董仲舒  
止雨書曰執事者皆赤幘知不冠者之所服也元帝

額有壯髮不欲使人見始進幘服之羣臣皆隨焉然尚無巾故言王莽禿幘施屋冠進賢者宜長耳冠惠文者宜短耳各隨其宜漢舊儀曰凡齊紺幘耕青幘秋緇劉服緋幘

古者君臣佩玉尊卑有度上有韍

徐廣曰韍如今蔽膝

貴賤有殊

佩所以章德服之衷也韍所以執事禮之共也故禮有

其度威儀之制三代同之五伯迭興戰兵不息佩非戰

器韍非兵旗於是解去韍佩留其係璲

徐廣曰今名璲為璲

以為

章表故詩曰韍韍佩璲此之謂也

韍韍佩玉貌璲瑞也鄭玄箋曰佩璲者以

瑞玉為佩佩之韍韍然

韍佩既廢秦乃以采組連結於璲光明章

表轉相結受故謂之綬漢承秦制用而弗改故加以  
雙印佩刀之飾至孝明皇帝乃為大佩衝牙雙瑠璜皆  
以白玉詩云雜佩以贈之毛萇曰玼璜瑠瑯衝牙之類  
月令章句曰佩上有雙衝下有雙璜瑠瑯以雜  
之衝牙瑠瑯以納其間玉藻曰右徵角左宮羽進則揖  
之退則揚之然後玉璫鳴焉纂要曰瑠瑯所以納間在  
玉之間今白珠也乘輿落以白珠公卿諸侯以采絲其視冕旒  
為祭服云

佩刀乘輿黃金通身貂錯半鮫魚鱗金漆錯雌黃室五  
色罽隱室華諸侯王黃金錯環挾半鮫黑室公卿百官

皆純黑不半鮫小黃門雌黃室中黃門朱室童子皆虎

爪文虎賁黃室虎文其將白虎文皆以白珠鮫為鏤口

之飾

通俗文曰刀鋒曰鏤

乘輿者加翡翠山紆嬰其側

左傳曰藻綷鞞韞杜

預曰鞞佩刀削上飾鞞下飾也鄭玄詩箋曰既爵命賞賜而加賜容刀有飾顯其能制斷也春秋繁露曰劔之在左青龍之象也刀之在右白虎之象也韞之在前朱鳥之象也冠之在省玄武之象也四者人之盛飾也臣昭案自天子至于庶人咸皆帶劔劔之與刀形制不同名稱各異故蕭何劔履上殿不稱為刀而此志言不及

未劔如為未備

佩雙印長寸二分方六分乘輿諸侯王公列侯以白玉

中二千石以下至四百石皆以黑犀二百石以至私學

弟子皆以象牙上合絲乘輿以縢貫白珠赤罽諸侯

王以下以繇赤絲縢縢繇各如其印質刻書文曰正月

剛卯既決靈爰四方赤青白黃四色是當帝令祝融以

教夔龍庶疫剛痺莫我敢當疾日嚴卯帝令夔化慎爾

周伏化茲靈爰既正既直既觚既方庶疫剛痺莫我敢

當凡六十六字

前書注云以正月卯日作

乘輿黃赤綬四米黃赤紺縹淳黃圭長丈九尺九寸五



百首

漢舊儀曰璽皆白玉螭虎紐文曰皇帝行璽皇帝

之璽皇帝信璽天子行璽天子之璽天子信璽凡  
六璽皇帝行璽凡封之璽賜諸侯王書信璽發兵徵大  
臣天子行璽策拜外國事天地鬼神璽皆以武都紫泥  
封青囊白素裏兩端無縫尺一板中約署皇帝帶綬黃  
地六采不佩璽璽以金銀滕組侍中組負以從秦以前  
民皆佩綬金玉銀銅犀象為方寸璽各服所好奉璽書  
使者乘馳傳其驛騎也三騎行晝夜千里為程吳書曰  
漢室之亂天子北詣河上六璽不自隨掌璽者投井中  
孫堅北討董卓頓軍城南官署有井每旦有五色氣從  
井出堅使人浚得傳國璽其文曰受命于天既壽永昌  
方圍四寸上有紐文槃五龍璽七寸管龍上一角缺獻  
帝起居注曰時六璽不自隨及還於閣上得晉陽秋曰  
冉閔大將軍蔣幹以傳國璽付河南太守戴施施獻之  
百僚皆賀璽光照洞徹上蟠螭文隱起書曰昊天上帝  
皇帝壽昌泰舊璽也徐廣曰傳國璽文曰受天之命皇

帝壽

昌

諸侯王赤綬

徐廣曰太子及諸王金印龜組纁朱綬

四采赤黃纁紺淳赤

圭長二丈一尺三百首

荀綽晉百官表注曰皇太子朱綬三百二十首

太皇太后皇太后其綬皆與乘輿同皇后亦如之

長公主天子貴人與諸侯王同綬者加特也

諸國貴人相國皆綠綬三采綠紫紺淳綠圭長二丈一

尺二百四十首

前書曰相國丞相皆秦官金印紫綬高帝相國綠綬徐廣曰金印綠綬綬音

戾草名也以染似綠又云似紫紫綬名綈綬音瓜其色青紫綬字亦盤音同也傳寫者誤作繫公加殊禮皆服

之何承天云綢音媯  
青紫色綬綬紫色也

公侯將軍紫綬二米紫白淳紫圭長丈七尺百八十首

前書曰大尉金印紫綬御史大夫位上卿銀印青綬成  
帝更名大司空金印紫綬將軍亦金印漢官儀曰馬防  
為車騎將軍銀印青綬在卿上絕席和帝  
以竇憲為車騎將軍始加金印次司空 公主封君服

紫綬

九卿中二千石二千石青綬三米青白紅淳青圭長丈

七尺百二十首

一號青  
綢綬

自青綬以上綬皆長三尺二寸

與綬同采而首半之綬者古佩璲也佩綬相迎受故曰

緹紫綬以上緹綬之間得施玉環鐕云

通俗文曰缺環曰鐕漢舊儀曰

其斷獄者印為章也

千石六百石黑綬三采青赤紺淳青圭長丈六尺八十

首四百石三百石長同

漢官曰尚書僕射銅印青綬

四百石三百石二百石黃綬淳黃圭一采長丈五尺六

十首自黑綬以下緹綬皆長三尺與綬同采而首半之

百石青紺綸一采宛轉繆織長丈二尺

丁孚漢儀載太僕太中大夫襄

言乘輿綬黃地冒白羽青絳綠五采四百首長二丈三尺詔所下王綬冒亦五采上下無差諸王綬四采絳地

冒白羽青黃去綵二百六十首長二丈二尺公主綵如  
王侯絳地紺縹三采百二十首長丈八尺二千石綵羽  
青地桃華縹三采百二十首長丈八尺黑綵羽青地絳  
二采八十首長一丈七尺黃綵一采八十首長丈七尺  
以為常式民織綵不如式没入官犯者為不敬二千石  
綵以上禁民無得織以粉組皇太后詔可王綵如所下

凡先合單紡為一系四系為一扶五扶為一首五首為

一文文采淳為一圭首多者系細少者系麤皆廣尺六

寸

東觀書曰建武元年復設諸侯王金璽綵綵公侯金

印紫綵九卿執金吾河南尹秩皆中二千石大長秋

將作大匠度遼諸將軍郡太守國傅相皆秩二千石校  
尉中郎將諸郡都尉諸國行相中尉內史中護軍司直  
秩皆二千石以上皆銀印青綵中外官尚書令御史中  
丞治書侍御史公將軍長史中二千石丞正平諸司馬

中宮王家僕維陽令秩皆千石尚書中謁者黃門冗從  
四僕射諸都監中外諸都官令都侯司農部丞郡國長  
史丞候司馬千人秩皆六百石家令侍僕秩皆六百石  
雒陽市長秩四百石主家長秩皆四百石以上皆銅印  
黑綬諸署長楫擢丞秩三百石諸秩千石者其丞尉皆  
秩四百石秩六百石者丞尉秩三百石四百石者其丞  
尉秩二百石縣國丞尉亦如之縣國三百石長丞尉亦  
二百石明堂靈臺丞諸陵校長秩二百石丞尉校長以  
上皆銅印黃綬縣國守宮令相或千石或六百石長相  
或四百石或三百石長相皆以銅印黃綬而有秩者侍  
中中常侍光祿大夫秩皆二千石太中大夫秩皆比二  
千石尚書諫議大夫侍御史博士皆六百石議郎中謁  
者秩皆比六百石小黃門黃門侍郎中黃門秩皆比  
四百石郎中秩皆比三百石太子舍人秩二百石

太皇太后皇太后入廟服紺上皐下蠶青上縹下皆深

衣制

徐廣曰即單衣

隱領袖緣以綵翦菴茵簪珥耳璫垂珠簪

以瑇瑁為撻長一尺端為華勝上為鳳凰爵以翡翠為毛羽下有白珠垂黃金鑷左右一橫簪之以安茵結諸簪珥皆同制其撻有等級焉

皇后謁廟服紺上皐下蠶青上縹下皆深衣制隱領袖緣以綵假結步搖簪珥步搖以黃金為山題貫白珠為桂枝相繆一爵九華熊虎赤羆天鹿辟邪南山豐大特六獸詩所謂副笄六珈者

毛詩傳曰副者后夫人之首飾編髮為之笄衡笄也珈笄

飾之最盛者所以別尊卑鄭玄曰珈之言加也  
副既笄而加飾如今步搖上飾古之制所未聞  
諸爵獸

皆翡翠為毛羽金題白珠璫繞以翡翠為華云

貴人助蠶服純縹上下深衣制大手結墨瑋瑁又加簪  
珥

長公主見會衣服加步搖公主大手結皆有簪珥衣服  
同制

自公主封君以上皆帶綬以采組為緄帶各如其綬色  
黃金辟邪首為帶鐕飾以白珠



公卿列侯中二千石二千石夫人紺繒繭黃金龍首銜  
白珠魚須撻長一尺為簪珥入廟佐祭者皁絹上下助  
蠶者縹絹上下皆深衣制緣自二千石夫人以上至皇  
后皆以蠶衣為朝服公主貴人妃以上嫁娶得服錦綺  
羅縠繒采十二色重綠袍特進列侯以上錦繒采十二  
色六百石以上重練采九色禁丹紫紺三百石以上五  
色采青絳黃紅綠二百石以上四采青黃紅綠賈人緇  
縹而已

博物記曰交州南有蟲長減一寸形似白英不知其名視之無色在陰地多緇色則赤黃之色

也公列侯以下皆單綠襪制文繡為祭服自皇后以下

皆不得服諸古麗主褻閨緣加上之服

司馬相如李夫人賦重旬始以

為褻注曰葆下旒也則褻之容如旌旒也

建武永平禁絕之建初永元又復

中重於是世莫能有制其裁者乃遂絕矣

蔡邕表志曰永平初詔書

下車服制度中宮皇太子親服重繒厚練浣已復御率下以儉化起機諸侯王以下至于士庶嫁娶被服各有秩品當傳萬世揚光聖德臣以為宜集舊事儀注本奏以成志也

凡冠衣諸服旒冕長冠委貌皮弁爵弁建華方山巧士衣裳文繡赤舄服絢履大佩皆為祭服其餘悉為常用

朝服唯長冠諸王國謁者以為常朝服云宗廟以下祠  
祀皆冠長冠皐繒袍單衣絳緣領袖中衣絳綉紵五郊  
各從其色焉

贊曰車輅各庸旌旗異局冠服致美佩紛璽玉敬敬報  
情尊尊下欲孰夸華文匪豪麗縟

後漢書卷四十

後漢書卷四十考證

輿服志下冠角顙胡之制○顙監本譌作顙依宋本改  
藻火粉米注粉若粟米○臣良裘按孔傳本作粉若粟  
冰作米譌也此志北宋本亦作粟冰

縫掖其袖合而縫大之迄今袍者○者下本或有也字  
進賢冠古緇布冠也○古字監本誤作右依宋本改  
却敵冠制似進賢○似字監本誤作以依宋本改

術氏冠注淮南子曰楚莊王所服讐冠者是○服字監

本誤作復依宋本改

秦施安焉○安毛本作之

故忠皆服其服○忠字疑衍

入學小童幘也句卷屋者○也疑作施

公侯將軍紫綬注始加金印○印應改紫

後漢書卷四十考證

謹案卷三十八第十一頁後五行禦侮摧冠刊本

摧訛推據毛本改

第十二頁後五行齏粉同氣刊本齏訛齋據監本  
改

卷四十第七頁後二行纏今之縋刊本縋訛縋據  
漢書注改





總校官庶吉士臣張能照

校對官檢討臣蕭九成

謄錄貢生臣江長鎰